

Txirritola

ARAMAIO / Barikua / 2004ko maiatzaren 21a / 109. zenbakia

KOORDINATZAILEA: Ubane Madera • Otolora Lizenziaduna 31 20500 ARRASATE • Tel.: 943 71 25 11 • Faxa: 943 71 23 89 • Posta elektronikoa: txirritola@goiena.com • Lege gordailua: SS.1084/02

Lastertasun Handiko Trenaren proiektuan aldaketak egon daitezkeela esan digute

UBANE MADERA

Lastertasun Handiko Trena dela-eta, aramaioar batek jakinarazi digu hasierako proiektua aldatu duten susmoa duela. Hain zuzen ere, Bolinburu eta Lugartei baserrien arteko zatia tunelpean joan beharrean, lur gainetik joango den kezka handia dauka hark.

Bolinburu baserriko Luis Mari Herizek kontatu digunez, joan den zapatuan, hilaren 15ean, Madrilgo topografo bi baserrira joan zitzaizkion plano batzuekin. Plano haien arabera, Bolinburu eta Lugartei baserrien artean Lastertasun Handiko Trenaren ibilbide zatia tunelpean joan beharrean lur gainetik joango da Kataiaraino; Bolinburu baserriatik 100 bat metro eskasera, hain zuzen ere. Jakina, horrek eragin zuzena izango du Lugartei eta Bolinburu baserrietan. Besteak beste, tren horrek egundoko zarata sortzen duelako.

Bere kezka handia azaltzeaz gain, Luis Mari Herizek salatu du eurei inork ez diela inolako abisurik eman, eta tren hori egiteko, gutxi gorabehera Bolinburu



Bolinburu baserriatik 100 bat metrora pasatuko da Lastertasun Handiko Trena.

baserriko 15 bat hektarea beharko dituztela.

Besteak beste, udaletxean galdetu du eta han jakinarazi diote udaletxean lehengo proiektuaren planoak dituztela eta ez die-

tela inolako aldaketaren berririk eman. Gauzak horrela, guk Eusko Jaurlaritzako Garraio eta Herri Lan Sailera jo dugu. Saileko teknikari Emilio de Franciscok jakinarazi digu posible dela

Madrilgo Sustapen Ministerioak aldaketaren bat egitea proiektuan. Herri Lan saileko teknikariaren esanetan, berez, hasierako proiektua jarraitu beharko lukete, baina aldaketak egin

ditzakete. Bereziki, kontuan hartuta Sustapen Ministerioak delatuta lanon ardura. Gaineratu zizun Legutianorainoko zatia proiektua dezente aurreratuta dutela Eusko Jaurlaritzan, baina Legutianotik gora doana ez dagoela horren landuta; horrenbestez, aldaketak egitea errazagoa dela. Are gehiago, gaineratu zizun halakoak gertatu izan direla behin edo behin.

Hori dela eta, kezkatuta daudenek zer egin behar duten galdetuta, erantzun zizun egokiena dela Udalera jotzea; Udalaren bitartez bideratzea kezka hori. Udalak Eusko Jaurlaritzara jo beharko du, eta hortik aurrerakoak Jaurlaritzara arduratuko da.

NONDIK NORA

Jaurlaritzaren proiektuaren arabera, Osinaldetik sartuko da Lastertasun Handiko Trena Aramaion. Tunelpean egingo du ibilbidearen zati handiena eta Bolinburu eta Lugartei baserrien ostean aterako da airera. Katalan zubia eraikiko dute eta handik Arrasatera sartuko da tren. Edozelan ere, esandako moduan, proiektua behin-behinekoa da eta baliteke aldaketarik egotea.



Umore ona joan den zapatuko bazkarian

Joan den zapatuan bazkari berezia egin zuten 60 urte bete dituzten zenbait aramaioarrek. Andre-gizon talde handia elkartu zen ospakizunean. Kontatu digutenez, Barajuenean meza entzun zuten lehenengo, eta gero Zabolara joan ziren bazkaltzera. Bazkalostean dantza saioa eta guzti izan zutela kontatu digute. Eta ederki asko ibili zirela. Oroitzapenerako argazkia ere atera zuten, Udaltx mendia atzean zutela.

LABUR

Joan den asteko artikuluari zuzenketa

Joan den astean, Aramaio Tropikaleko Gazte Asanbladaren gaineko artikuluan aipatu genuen aurtengo jaietarako aurrekontua dezente murrizta dela. Eta oker geunduen. Mertxe Mondragon alkateak jakinarazi digu aurtun 20.000 euro dituztela San Martin jaietarako, iaz baino gehiago. Gazteek ere argi utzi nahi dute iaz baino diru gehiago dagoela aurtengo jaietara; edozelan ere, gaineratu dute euren ustez kopuru hori ez dela nahikoa. Barkatu eragozpenak.

TELEFONO JAKINGARRIAK

OSASUNA / LARRIALDIAK

Osasun etxea (txandak)	945 44 53 40
Botika	945 44 50 03
Udaletxea	945 44 50 16
Ertzaintza (Arrasate)	943 79 71 99
Gurutze Gorria (Legutio)	945 45 52 52
San Martin Eskola	945 44 50 04
Taxia eta autobusak	945 44 50 33
Udal kirodegia	945 44 53 35
Postetxea	945 44 50 83
Zulako Eskualdea	945 43 01 67
Suhiltzaileak (Zubillaga)	943 78 28 00

AUTOBUSORDUTEGIA

ARRASATE	ARAMAIO	GASTEIZ
07:00	07:15	08:00
10:00*	10:15	
11:00	11:15	
12:00*	12:15*	13:00
15:15	15:30	16:15
17:20	17:35	
18:30*	18:45	
20:30	20:45	21:25
21:00*	21:15	

GASTEIZ	ARAMAIO	ARRASATE
08:15	07:50	08:05
	09:00	09:15
	10:15*	10:30
	11:15	11:30
13:10	13:55	14:10
16:20	17:05	17:20
	17:35	17:50
	18:45*	19:00
19:30	20:00	20:15

OHARRA: izartxoan duten orduetan eskaeraren araberako zerbitzua eskaintzen dute. Auzoetako bizilagunei zuzendutakoa da, eta autobusa erabili gura badute, bezperan deitu beharko dute honako zenbaki honetara: 629 54 59 23

OHARRAK

BAÑERAREN EMAITZAK

Neskek bukatu dute aurtengo denboraldia. Azkeneko partidua, Fumin-koniren kontrakoa, ezin izan zuten jokatu, jokalaria nahikoa ez zirelako agertu. Hortaz, 0-1 galdu zuten. Mutilei dagokienez, zapatuko partiduan 9-2 irabazi zieten Jesus Obrerokoei. Bihar, zapatua, berriz, Kanpezun dute partidua, 11:30ean, Kostaleraren kontra.

BARIKUKO ZINEMA

Oraingo honetan, Roman Polanskiren *El Pianista* filma emango dute. Nazismoaren gainekoa da.

DOMEKAKO ZINEMA

Leyendas del Océano marrazki bizidunen filma emango dute. Abenturazkoa da eta pertsonaien artean, batek Coustearu zientziagizon ezaguna irudikatzen du.

EMAKUMEEN TOPAKETAK

Aurten Murgian izango dira Zuiako Koadrilak antolatutako Emakumeen Topaketak. Interesa duenak maiatzaren 28a baino lehen eman behar du izena.

Jende asko eta giro polita Orixolen txangoan; hurrengoa Pirinioetara

UBANE MADERA

Ondo asko ibili ziren joan den asteburuan Orixol Mendi Elkartearekin bat egin eta asteburua kanpoan eman zutenek. 40 lagun baino gehiago joan ziren txangora. Datorren astebururako beste ekitaldi bat antolatu dute, Pirinioetara.

Ume eta nagusien artean, 42 lagunek parte hartu zuten joan den asteburuan Orixol Mendi Elkarteari antolatutako txangoan. Eguraldiak lagunduta, oso ondo ibili zirela kontatu digute. Zapatuan, Jaizkibel inguruan ibili ziren, eta Guadalupen bazkaldu ostean, Hondarribian pasatu zuten arratsaldea. Domekan, berriz, Hendaiara joan ziren goizean eta hondartzan eta Abbadie erreserba naturalean ibili ziren. Bazkalostean itzuli ziren etxera.

ORAIN, PIRINIOETARA

Bestalde, datorren astebururako beste irteera bat antolatu du Ori-



Hendaiako hondartzan eta Abbadie erreserba naturalean ibili ziren domeka goizean.

xol Mendi Elkarteari. Pirinioetara, oraingo honetan. Maiatzaren 29an eta 30ean egingo dute irteera. Hala, maiatzaren 29an, sei-zor-

tzi orduko ibilaldia egingo dute: Belagua-Hiru Erregeen Mahaia-Linza. Eta maiatzaren 30ean, bost-zazpi ordukoa: Zuriza-Txipeta-

Selva de Oza. Bazkideek 55 euro ordaindu beharko dute; gainera, 65. Lo egiteko zakua eraman beharra dago.

BOTEPRONTOAN/ Aitor Axpe · Pilota partiduetan epaile

“Pilotaren inguruan sortu diren enpresak dirua ateratzeko egiten dute egiten duten dena”

Aitor Axpe azkoagarra da. Hori bai, ezkondu zenetik Akalean bizi da. Berez, Fagorren egiten du lan, baina hortik kanpo pilota partiduetan jarduten du epaile lanetan. Azkenaldian, profesional mailan askotan jardun du eta hemendik aurrera ere askotan jardungo duela esan digu:

Zela hasi zinen epaile?

Aurrez pilotaria izan nintzen, eta beti egon naiz Barea Pilota Elkartearen barruan, Enrikeri laguntzen. Horren bitartez atera nintzen epaile. Taldea antolatu genuenean, pilotariek gain epaileak ere behar zirela-eta, Aramaiotik lau lagun joan ginen. Azterketa egin genuen Euskal Federazioan eta horrekin eman ziguten epaile titulua, orain dela 15 bat urte.

Zenbat zarete Euskal Herrian?

Guztira, 100-edo. Baina hor ere eskasia dago. Ia ez dago inor besteei laguntzen lan egingo duenik, eta epaile izatea zerbait ordaintzen da, baina ez asko. **Hori horrela, zaletasuna da zuena, ez ofizioa, ezta?** Nik garbi daukat zer den. Orain arte ia beti zaleen mailan ibili naiz, eta ia beti hemen, Aramaion. Zertarako? Bada, hemen partidua jokatzeko direnean,



“Benetako zaleari, haurrak, gaztetxoak eta profesionalak gustatzen zaizkio”

inori deitu behar ez izateko. Baina orain dela bi urte profesional mailan Aspek eta Asegarek LEPM sortu zutenean (pilota txapelketa), eurek aukeratu zituzten epaileak. Probintzia bakoitzeko kopuru txikitxo bat. Hala, Araban bi epaile bakarrik gaude. Jakina, pilotan, edo barruan zaude edo kanpoan zaude. Eta nik baietza eman nuen. Batez ere ikustearren zelakoa den mundu hori. Hala, normalean, bi partidutik batean egotea tokatzen zait. **Badirudi pilota apur bat aldrebestuta dagoela azkenaldian...** Enpresak direnez, dirua, dirua eta dirua besterik ez dute buruan. Eta gainontzeko guztia erabiltzen dute dirua ateratzeko. Ez dut esaten pilotariak gaizki zainduta egongo direnik, edo prestakuntza txarra dutenik. Baina, kirolaren

ikuspuntutik ikusita, pilotari askok momentu askotan derrigorrez jokatu behar dutela-eta, jokatu egiten dute. Hori argi ikusten da. Enpresa dira, dirua ateratzeko sortuta daude, eta dirua ateratzeko egiten dute egiten duten dena. Eta aldrebestu? Bada, bueno. Nik uste dut hori dela funtsezkoa: kirol arloari ez diotela lehentasunik ematen, baizik eta diruari.

Halako batzuetan ikuskizunak galdu egiten du, hortaz, baita zaleak ere...

Zalea kaltetuta ateratzen da, bai. Baina zaletasun hori ere... Hor dago, adibidez, Goñiren kasua. Agertzen bada pilotalekua bete egiten da, jakinda Mikel Goñi orain arte ez dela izan eredu. Ahalmen batzuk baditu, baina beste edonor izango balitz ez litzateke hor egongo. Zein da arrazoia? Pilotalekuetara jendea joaten dela. Eta nik ez dut ulertzen. Mikel Goñi jokatu beharko luke bost bider hobeto.

Kontuak kontu, Aramaion bada zaletasuna, ezta?

Umeak erakartzea erraza da, baina eskolako ordutegiaren barruko ekintza moduan hartzen dute. Domeketan, adibidez, ia inor ez dabil pilotan.